

寧河縣志卷之八

人物志 凡七

人材之興應乎運會蓋非獨地氣使然也寧邑向隸於寶梁城以下鮮聞人至

國朝碩輔挺生應運而起自是人文日盛矣分邑以來蒞茲土者又率多良吏科名鼎盛後先接踵而耆年碩德望重一鄉者獨行之士亦不乏焉下至幽閨婦女矢志不渝儼然與鬚眉爭烈何其盛也所謂人傑則地靈者歟抑其涵濡

寧河縣志

卷之八 人物

一

聖化者近耳志人物

名宦

後唐

趙德鈞幽州人有勇力好權畧從劉守光爲軍校守光末之奇也歸莊宗乃大奇之賜姓名曰李紹斌初莊宗遣大將周德威攻拔蘆臺軍進克燕城執守光以歸同光中以德鈞鎮蘆臺遂因鹵地置鹽場又舟行別置新倉以貯之開渠運漕貨鹽瀛莫間資其利用是饒衍雄於一方明宗時以其子延壽尚公主尤

厚遇之在鎮十年常敗契丹兵執其將赫邈威名甚著

按德鈞晚節不終殊無足取然當其鎮蘆臺時置鹽場立新倉實開萬世之利錄其功焉可也

明

于 本江南金壇縣人寄居寶坻縣之俵口鄉

今屬寧河

夙嫻勇畧建文三年都督陳賢招募從軍哨蘆臺殺退東軍在梁城招募新軍累功陞本所守禦千戶仍以百戶守禦直沽海口哨探東軍聲息十二月征哨

寧河縣志

卷之八 人物

二

滄州河南泥沽村擒德州衛賊軍王果住等五名四年征哨草頭沽三月哨鴉鴻橋通州遇東軍燒白河橋上城守禦四月在梁城殺退東軍哨草頭沽燒退賊軍船隻五月征哨寶坻縣張家莊殺退賊軍至永樂二年正月奉吉字號勘合陞指揮僉事仍於梁城守禦千戶所守禦海口尋節次征進迤北爲老病告替長子于昶遂授昶本所指揮僉事其後世代承襲俱克無忝厥職本之貽謀遠矣

張諒先薊州豐潤縣人明建文三年十月都督陳賢

齊榜招募諒先奮身報効自願從軍四年三月進征
鴉鴻橋隨征石城韓城遇遼東都督楊文軍殺退之
越日鎮海衛夏百戶領軍二百餘名擄掠梁城復力
却之時千戶鄧士賢謀叛擊走其衆六月征哨石城
韓城值夏百戶復領軍擄掠力戰久之殺死南軍二
十名敵始遁去永樂二年正月奉吉字號勘合陞授
梁城所百戶宣德元年卒於官子甫榮承襲原職及
老無子以弟甫春之子彪承襲由彪而下相承不替
俱食諒先遺澤焉

寧河縣志

卷之八

人物

三

鄭 昂任梁城所守禦千戶

按朝陽寺碑係百戶

果敢有膽力

當明季流寇猖狂常思奮身立功以職守不得擅離
無所試其材一日聞賊臨境慷慨起曰今吾得自効
矣策馬負弓矢持刀以出從者不過數十騎居人控
馬諫曰公將何爲賊不下數萬計而公以數十人與
之抗其不能敵也必矣公卽以死殉其如此方之民
何莫若闔門以待賊或以村落不措意徑過吾屬猶
可望生也昂重違衆意於是斂息立門左欲俟其至
以一戰效死未幾賊至城外徑去梁城民得無恙而

昂終以未死是役爲憾居常鬱鬱不自得後移他汛不知所終

袁黃字了凡嘉善籍吳江人登萬歷丙戌進士戊子夏知寶坻縣事孜孜焉日以化民爲急開導引掖務使同歸於善而後已其勸農書水利說凡數千言周詳委曲因地制宜尤有關於民生大計監是邑凡六年民安其業士佩其訓當時合邑感戴建生祠於城北四時咸致祭焉迄今寧邑雖分仰遡恩施實與寶坻並受其賜以故鄉閭中談公遺事每津津樂道

寧河縣志

卷之八 人物

四

之謂大有造於吾土者也凡諸政績具載寶坻志中茲不備述爲記其大畧云

高承埏字寓公嘉興人也崇禎己卯舉於鄉明年成進士除遷安令十五年調知寶坻凡事之不便民者皆力爲罷之更能以其餘力修城垣浚濠塹練兵積粟爲守禦計而城亦卒藉以全方是時流寇披猖所在蜂擁大盜蘇鳴秋等盤踞於寧之埋珠莊鄉愚又從而附之勢張甚當事者議率兵勦捕承埏獨鎮以靜計禽之兵未至而賊已就獲因力自主者誅首謀

脅從者得獲免焉埋珠數百戶賴以更生至今猶歌頌之云

于君鼎以指揮掌梁城所事當明末流兵四起攻城擄掠薊州寶坻等處俱失惟本所西城規模尚在因率合城千百戶吏目等官築城濬池多方守禦誓死不去流賊直抵城下時河水大潮一日三次兵不能進又感 關帝救護遂引去自是百里外多逃難於此賴以得全者不下數萬計又月河莊妖道頓興謀不軌搶奪官軍馬匹時調兵平之妖道豫知遠遁兵

到止獲一僧問之僧曰已往梁城所矣主將卽移兵城下勢將屠城合所震懼君鼎挺身出城盛冠服以迎左右執之主將曰爾何人敢擅至此君鼎曰梁城所地方官特來迎接主將曰聞汝地方反矣得毋來探虛實耶答曰地方無人反故來迎接使有反者自當擒以報効其色甚温其辭甚壯主將因率兵入城覘其動靜見四境帖然遂屯兵於西城上未幾忽有大船二從上流至南河內中有壯丁三十六人家屬俱在聲稱逃難主將以爲逆黨縛至中軍又將所中

于篤培王漢臣等四人縛至與賊對質反情及訊明遂將船上三十六人俱斬於教場班師而回梁城兩難士民幾爲壘粉卒使無恙皆君鼎從中調護維持謀斷之力至今談者猶美其功焉

國朝

伍澤榮字蔭遠祁陽人雍正丁未進士歲辛亥知寶坻縣事素以濟人利物爲己任臨政必行其志事之有益生民者無不殫力以奏效其詳載寶坻志可考也而寧邑受其利者則於濬新河之役爲最大公尤

寧河縣志

卷之八 人物

六

加意人材凡邑中治舉子業者雖鄉僻離縣治百里必使人索其文佳者獎美再三有未完善必刪改付之俾知肯綮每月率以爲常如師之課其弟子焉後以亢直罷歸都人士相送於道者無不欷歔泣下至今猶歌思之

以上俱在未分縣前

楊奇昌四川廣安州人領乙酉鄉薦雍正九年知縣事本邑之首泄政者也時當縣治初分召募書役皆鄉氓不解任事公親爲教督粗識規模曰此已足矣

吏胥不必求才能凡舞文枉法蒙上凌下皆若輩爲之也一切治民之政務尚寬厚每念首事者開其端後來將踵而甚之故凡所施行慎之又慎而意尤在黜浮囂崇儉樸積今四十餘年民猶傳其風教焉

沈 濬號巨川貴州黃平州人登康熙庚子賢書雍正十一年知縣事性淳樸政簡刑清邑自九年分設初任楊奇昌甫逾歲以憂去時方草創諸務待理濬適繼之力董其事凡文武官署及監倉等工役度地程材必參相得而 學宮之建尤所加意相擇善地

卜吉鳩工不少緩又復振興士氣立會課文親加甲乙士爭自濯磨由是文風日盛寧固澤國沿河一帶水利可興乃令挑溝疊堰引水灌園民享其利至今稱沈公溝焉以鹽案被謫去舉邑惶惶如失怙恃士民相送者莫不遮道攀轅嗚咽涕下自城中至月河二十餘里絡繹不絕

洪肇楸字時懋江南歙縣人癸卯進士乾隆四年署寶坻事越明年題署寧河又明年仍調寶坻計治寧者僅八月此八月中興廢舉墜愛民恤士一以治寶

者治寧寧之北門爲四達孔道舊有橋梁日久傾圮
東門外有東窩渡亦寧邑要津適亦破壞公至之日
卽與士民謀新之咸踴躍鼓舞樂襄其成遂鳩工庀
材歷數月而告竣公嘗自爲之記載寶坻志中
今見藝文
未幾移他邑其所設施未盡然民已頌聲不絕矣
屠祖賚湖北孝感人乾隆己未進士歲辛未來蒞茲
土一以培養人材興利除害爲先務寧地卑窪瀕海
水漲輒淹田禾爲居民病前令沈濬開渠蓄水民食
其利祖賚復踵之極盡勤勞以奏成效初 學宮締

造未盡偉觀爰因舊址整理一新朔望集諸生教以
孝弟禮讓并於讀書作文之方不憚諄切指示間遇
蝗孽則親赴村莊督令各莊戶自行撲打絕不添役
協助以爲民擾嘗出所得俸廉鳩工濬河於丁男一
無徵發民甚便之方初蒞任時邑遭水患前令未報
祖賚下車後訪民間疾苦見所食者俱草根木皮喟
然歎息遂懷民所食者赴省謁 制軍求賑以報災
踰期不允所請因出所懷以呈備述苦狀 制府深
嘉之准借運遵化倉糧以濟民困溝瘠賴以存活食

其德者至今歌誦不絕於口後調長垣陞別駕

李清彥冀州棗強人乾隆二十五年以廩貢司鐸寧
邑初到任卽於學校三致意焉由是培植人才振興
文教每月命題分課諸生復會文於學署一切飲饌
自爲供具獎勵誘掖委曲備至視塾師之誨其弟子
不啻過之二十六年寧邑大水奉委查辦戶口凡分
管村莊實力稽查不使稍有遺漏親散賑票絕不假
手胥役用度俱計值發價毋許從中科斂至貧士尤
加軫恤於按數給賑外其有饑寒特甚者復出貲助

寧河縣志

卷之八 人物

九

之闔學感戴不忘後捐陞知縣公送精明渾厚匾以
頌之臨別贈詩泛舟恭餞契慕之情依依不忍舍分
縣以來言師範者固當以清彥稱首焉

論曰循吏難矣考史記孫叔敖而下五人漢書黃霸
而下六人而唐而宋其間或十數人或數十人苟非
實有功德於民者無由濫入求其所居而化所去而
思蓋其難哉後世人冒榮名其所紀載類多溢辭不
足考信識者病焉然鄉閭父老樹底輟耕牆根曝背
於有司政治之美每樂爲子若孫津津道之知三代

之直道常存也茲悉屏私評博採輿論得若而人焉其未分縣前則間存寶坻之舊示不忘本也蒞斯土者當亦聞風而起矣

鄉賢

杜立德字純一明崇禎癸未進士入

國朝以薦徵授中書選給事中疏請舉行

經筵以及定朝期嚴加派肅禁地多被嘉納所糾彈不避權貴累遷刑部尚書每讞重辟必周詳反覆冀求其生得則退有喜色不得則日中不出署抵暮歸或竟

寧河縣志

卷之八 人物

十

忘食一日入奏畢

世祖章皇帝顧左右曰爾等識此人乎此新授刑部尚書杜立德也不私一錢亦不妄殺一人其爲

上所褒獎如此康熙初轉戶吏二部拜保和殿大學士殫心獻納具得體要

聖祖仁皇帝嘗歎爲不愧古大臣歷朝十餘年恩禮優渥嘗賜宴

特命列坐殿內漢大學士入殿坐自立德始也以疾乞休陳請再四乃令護歸

御製五言律詩一首及怡情洛社圖章以寵其行初寶坻以隸通州故分派剝船百有二十甚爲民累以立德力陳得稍減至是歸欲然若未有權位者遇故舊有加禮人益賢之及卒

上震悼祭葬如例

賜諡文端康熙五十二年崇祀鄉賢

杜立本字華升大學士文端公胞弟也年十七補弟子員隨丁父艱適病在床羸弱殊甚忽值大變突趨躄踊竭蹶盡禮而疾反愈人以為孝感所致云服闋

寧河縣志

卷之八 人物

七

益奮志棘闈黽勉弗輟時文端公恭遇

覃恩廕一子公友于之誼素篤念弟困場屋鬱鬱不得志遂移廕予之己未八月由廕生補授刑部陝西司員外郎克慎厥職多所平反一時頌明允焉辛酉四月遷戶部山西司郎中判度支惟謹癸亥奉

命出守廬州以母老不能奉板輿行憂形諸色時文端公致政家居將行每對兄弟涕泣依依不忍去文端公亦悲不自勝勉以服官大義居久之敦迫再三始就道之任廬陽甫下車卽以興利除弊爲己責舊規有所謂

牙帖者歲入不下千餘金悉去之獄無大小不厭反覆務得其情而後已歲饑詳蠲逋賦籲緩徵輸又爲之先設粥廠暫濟朝夕然後申懇放賑民賴以全活者甚衆廬之人士悉愛戴焉爲作歌頌勒諸貞石以垂不朽癸酉春致仕歸親舊一切往來惟以禮義勤儉殷殷相誥誡凡親族中貧不能婚葬者悉竭力周給之歲癸未水滂大歉盡出家糧以濟貧乏無少吝迄今族黨間猶嘖嘖稱道不衰康熙五十三年從祀鄉賢

寧河縣志

卷之八 人物

三

杜恭俊字承三大學士文端公季子也以 恩廕補工刑兩部司曹綜核詳審具有條理以憂歸康熙庚辰迎

駕三河

上詢知故相子甚喜并問立德葬處

御書永言惟舊四字賜之補刑部督捕郎勘逃緝諸案多所保全出知廣信府未幾卒恭俊內行完備推財讓產尤能濟人緩急有某姓者逋官賦三百金將鬻其女恭俊捐金代償爲女擇良家子配之其盛德類如此

康熙五十三年從祀鄉賢

論曰語云與其爲善於鄉毋寧爲善於國竊謂爲善於國必自爲善於鄉始故觀於鄉而其人之真見矣夫少相習長相優者莫如鄉人其起居嗜好衣服飲食以及一嘖一笑之微無不熟窺而竊志之鄉而以爲賢斯莫不賢矣吾寧僻處海滙前乏聞人自文端公奮跡梁城歷躋宰輔其功業顯燦彪炳千秋者自有

國史在無庸妄議間嘗經其故居謁其墓緬其風流餘

寧河縣志

卷之八 人物

三

韻肅然如將見之及訪諸父老而孝友之性沉靜和厚之德猶咨嗟稱道之不衰何感人深也非獨公賢乃其弟若子亦有足稱者焉夫豈以名位重哉此鄉人意也鄉而以爲賢斯莫不賢矣故謹記之以爲居鄉者法

仕績

杜恭琦字又韓未週歲卽失怙賴胞伯文端公教誨而成全之少年性嗜讀書不屑章句推尋聖賢至理及長尚節義篤倫紀年三十九丁內艱寢苦枕塊水

漿不入口者五日再三慰解始啜粥不致減性鄉黨莫不以孝稱遊庠後力攻舉業屢試不售以援例官主政初管戶部富新倉監督事嚴禁倉書勤查夫役包攬偷竊之弊爲之一清旋補工部清吏都水司於河工水利道路橋梁無不精心籌畫至管理街道稽察五城秉正無私不避權貴尤其彰彰較著者年近六旬遂引疾乞休優游林下以田園自娛雍正己酉有開墾稻田之令恭琦自將熟田竭力改墾並不領帑時監督顧以孝弟力田匾獎之卒年六十有二

寧河縣志

卷之八

人物

古

李維楨字周臣號葵齋由恩選起家初授行人旋遷戶部正郎俱克稱厥職康熙四十一年十二月

欽賜

御書一幅乙酉冬出守台州台固東南僻壤環山濱海昔經兵燹之所維楨甫下車卽攬轡巡行見田原蕪穢慨然曰郡無大小惟在實心以亟本計農誠先務乎於是首稽田畝核丁男減賦稅寬徭役他若繕倉葺學課士養老諸善政亦次第具舉不匝月而郡稱大治明年春土膏滋動維楨乃撤軒蓋披風日度阡越陌

親巡四野大集農民力勸興作給種與耒以資貧乏
又出牛酒以供賞勞農民扶老攜幼捧樽荷蓀各受
其賜謹呼動地至有感歎泣下者維楨復檄各屬凡
不便農者悉爲釐剔山濬溪渠海屏斥鹵其勞來率
作之法一如已所親巡闔郡人士戴德歡躍相率爲
詩以傳其事復繪於圖以狀其盛遂安毛際可親爲
篆額而仁和錢昶爲之記其實心爲民亟於本計洵
有足錄者迄今披李太守勸農圖當年官民相愛之
情猶令人神往不置也維楨兄弟三人長維翰任楚
雄府同知季維祥任禹城知縣陞府佐
于君卿字贊侯素性英偉功名志切家甚貧終不稍
懈康熙丙子中式武闈庚辰成進士

寧河縣志

卷之八

人物

五

特簡江南鎮江衛守備兼攝揚州衛漕糧蒞政十三年有賢
聲時 制軍黑公薦語云清正廉明無曠厥職可以
得其概矣

吳 璉字商珍雍正癸卯科副榜任贊皇縣教諭培
養士氣訓迪有方後學成就者多出其門歷任八年
士林懷之璉弟珍字席菴雍正甲辰副榜教習期滿

選授高邑縣教諭足稱競爽焉

杜適文字紹衣大學士文端公孫恭俊子也性至孝
十歲居父憂讀禮盡哀旣長博觀羣書工舉業日夜
淬勵思一第以紹前烈不汲汲仕進雍正己酉

世宗憲皇帝念舊勞

特召見奏對稱

旨發河南試用通文以未卒業辭弗許歷署內鄉郟城西平
臨潁縣篆政聲翕然時 制府田治尚嚴明適文隱
以寬濟之決獄平無少枉者捐養廉募夫築隄親督

寧河縣志

卷之八 人物

六

率之比隄成水發不爲害擢鄧州牧 制府方行開
墾令察民間欺隱者適文所報獨少他日詢之曰他
邑自多鄧州自少 制府無以難已乃大修 文廟
重建春風閣百花洲一時以爲杜母復出乾隆元年
移知陝州城中向資渠以濟汲歲久淺涸適文率民
疏濬自分水嶺注城凡三十餘里水常不竭州儲穀
萬餘石時發碾以賑出入數親較之猾吏無所措手
會母穆宜人卒於署扶櫬北歸哀毀骨立病遂不起
年止四十有四大學士桐城張公表其墓

劉毓珍字儒懷號雨村少家貧銳志於學既長入都門與四方人士交遊日相切劘所造逾邃純然儒者風也歲壬子薦於鄉癸丑成進士觀政刑曹期滿令閩之建寧建寧素稱刁悍與剔孽畫能撫柔之使馴值歲饑力爲民籌如入人室家而謀之七年擢補永春牧凡所施設如古良吏每念雙親垂白淚涔涔不能止到任後卽陳情乞養歸未及旋里而父母已相繼逝矣抵家哀毀絕而復甦葬祭悉盡禮服闋遂不仕鄉居二十餘年不理家務惟日課子若孫讀書吟

寧河縣志

卷之八 人物

七

松菊之舊徑欵鄉里之素歡淡泊寡營人疑其隱君子也

劉守成字耕村乾隆丁巳進士任浙江武康縣歷調江山海寧陞湖南岳州府同知留補蘇州通判自幼好讀書日夜不輟尤好接引後學凡族中遠近子侄輩皆爲口講而指畫之藉以成名者甚衆與人言率以古聖賢之道相勗及宰武康政績班班惠人民整風化凡一切利害當興除者無不以身任之由是深得民心其自武康調江山也百姓詣撫軍懇留不獲

命遮道攀轅甚至泣下道旁相送數十里其後歷任亦咸有政聲迄今口碑猶傳焉然卒不獲大伸其志以通判任內罷職家居卒

談嘉勳字式南以廩生官直隸深州訓導月課季考務傳集明倫堂鍵戶試之會同學正酌定甲乙不徒視爲具文仍於發落時凡經史諸書以及作文法程無不細爲講究三年之中文風丕振又慮深俗强悍士有滋事者必嚴加戒飭不爲姑息且諄諄諭以

功令森嚴宜恪守卧碑毋自取咎其或詞訟被誣者查

明卽赴州代爲昭雪州牧重其秉正不阿每樂從之以故多獲保全壬午領鄉薦越明年以丁生母艱回籍深士攀轅流涕戀戀不忍捨去服闋選授奉天府寧海縣教諭己丑會試染病旋里而卒

杜懋曾字景沂性聰慧嗜學氣量豁達少年自負甚高行文信筆立就多不起草遊庠食廩五薦棘闈數奇不售以援例官安州訓導而讀書之志終未稍懈日進士子獎勸鼓勵按期會課卽其文而甲乙之由是士奮於學初安州赴鄉試者每科祇數十人自懋

曾到後漸至百餘居官後復下闡者三皆不得志乾隆二十八年卒於官至今安州人士眷眷不忘猶思杜公遺澤云

劉毓琪字東美性嗜詩書敦孝友甲子領鄉薦春闈屢薦不售尤喜引進後學藉以成名者甚衆丙戌歲就揀選司鐸義州明倫講學訓迪有方以故人文蔚起爲上憲所器重焉奉委署廣寧學篆其振興學校一與義州同旋兼攝縣事撫育黎庶釐剔奸弊絕不以五日京兆爲推諉及卸事回義攀轅餞送者無數

寧河縣志

卷之八 人物

九

公爲人守正不阿在義十年從不干與地方事一以講學課士爲己任義之人士至今尸祝云

劉灼壬申舉人少負才名通世務父卒家中落與兄炳就館他方以修金奉母養弟斫從學亦入泮歲丙戌揀發江南以知縣用大憲器之曰此非百里才也委以安慶江防同知試可旋署宿州宿號盤錯地雖才有力者弗克勝而灼游刃有餘一時咸以得人爲慶後因公被劾識者惜之而灼坦然也旋里後寄情文酒敦友誼善排解鄉隣尤倚重之

附 忠節

周國衡吏員官四川秀山縣典史乾隆二十一年之
任三十九年

大兵進勦金川委赴澤耳多炭廠調撥炭夫適被賊番攻
圍衝出至登春山梁遇害蒙

恩卹賞 賜葬祭 贈主簿入祀昭忠祠

命查隨軍事蹟交翰林院立傳廕一子入監讀書照例候
銓子名勝英年幼與母施氏留居川省報明咨部候
成人回籍承廕焉

寧河縣志

卷之八 人物

三

論曰古君子草茅伏處非徒獨善之謂也其於化民
成俗之務無不講明而切究之一旦得尺寸柄用能
著政績於天下蓋其所規畫者裕矣邑自杜文端公
二三鄉賢外政績可紀者凡若而人跡其所設施皆
克無忝厥職非規畫素優安能如是是所謂學而入
政者歟能聲藉藉鄉閭與有榮焉豈獨彼都之遺愛
也耶

文學

崔周田字錫齡順治中充歲貢不復入場屋性嗜書

嘗建一樓聚古本及金石刻萬卷藏之終日吟嘯其中李孔昭隱於盤山物色者輒不遇周田過之往往坐林石間相勞苦孔昭亦時下榻其家命諸子師焉并迎孔昭母事之維謹以女妻其子此孔昭賦謝詩所以有高堂代我供甘旨花院呼兒說史書句也孔昭歿周田漠然無所向久之卒

劉繼寧字兌菴少負意氣千金一諾有古俠士風當明季嘗捐金贖難女二爲之擇配歲饑煮粥以賑全活甚衆與同里崔周田善有緩急恒貲之如已事周

田亦弗謝也晚年爲子擇師乃裹糧遊盤山踪跡李孔昭得之甚相樂也已而相泣宿經旬具道意曰吾家僻處海濱兩岸蘆花倘不拂先生高隱趣乎孔昭許諾至今諸子受業暇則招周田聚談終日視人世利達如浮雲然子三從雅從心從正皆以文行顯雅任從化縣作孔昭墓碑誌銘則心所撰也正子浚字蘊哲最知名

杜恭著字紫安大學士文端公長子也髫齡時姿貌莊偉穎悟過人稍長文卽可觀授以經書講解輒能

領會文端公深喜之爲人寡言笑父兄師長前逡巡
辟咄恂恂終日無惰容尤好淡素絕去統袴陋習凝
塵几席湛如也年十七遊泮名噪膠庠旋食廩餼益
肆力於古大家之文庚子秋闈其文高古迥絕恒蹊
見者決其必售以場中各持所見遂置乙榜第二人
皆代其怏怏而已幾微無愠色曰吾年方少益研精
弗劬以俟再舉耳何憾焉人服其度方文端公爲刑
部尚書時蒙

恩廕一子恭著以廕讓弟恭瑤其天性友愛如此

寧河縣志

卷之八

人物

三

劉肯堂繼寧之曾孫也生而敏異食餼後試輒前茅
數奇不偶屢躓棘闈嘗以不能盡讀遺書爲恨治麟
經指陳子奪大指歷歷與紫陽綱目互相發明妻崔
氏雅能梁案相莊鷄鳴夜火之餘惟以課讀爲先務
子三皆入泮而次子灼領鄉薦署宿州知州

崔瑞麟字勝吉廩膳生事母以孝聞幼師王淑莘先
生頗有心得作文根據經史不尚綺靡數奇三薦不
售遂不圖仕進惟以明經課讀爲事嘗謂孔孟只一
權字權者仁之純義之精而心之用大學所謂至善

中庸所謂時中也察之由之煞有學問在漢儒不識以爲反經而良知家專事心學又流爲虛寂朱子以尊德性爲存心道問學爲致知謂是修德凝道之大端得其要矣而下手做工夫處恃有慎獨人幸有此處善惡分明過此便無可捉摸了其心學根柢實宗盤峯云

劉毓珣字蒼璞號竹軒幼嗜詩書學爲文章與伯兄毓珍相倡和中年善病乙卯鄉薦後不事時藝雅好草書日聚古人名蹟而臨摹之三十餘年無少間遂

覺道勁多姿自成一家四方當道者多覓而藏之性至孝敬兄慈幼鄉黨無間焉

張 恕增廣生性嗜學閉門守拙日以課子若孫爲事通五經左傳及四書句讀頓連精於等韻邑中言字學者得折衷焉知縣黃國楹趙憲李之蓉耳其名延爲義學社長十年以才學兼優區褒之壽七十二而卒

崔鶴庚甲子舉人少負奇氣率真父母前至壯盛猶依依如孺子態讀書敏慧諸子百家手不停披畧識

大意不沾沾於章句訓詁而出口淹貫常發先儒所未發諸生時卽爲知縣洪肇楸所器重後肇楸調寶坻纂修邑志猶專以採輯相托志中事蹟蒐羅多賴其力

談聲聞字鳴九 恩貢生好讀書工文章九赴棘闈薦卷者四數奇不售家貧如洗循循矩矱毫無所苟生平惟以舌耕爲業講解經史討論古今尤於存心行事加意提撕嘗云人若心術不正行止不端根本已壞雖胸藏萬卷不可爲人門下士奉以爲宗鄉黨咸矜式焉知縣鍾象山重其爲人延主義學三年之內亦多所造就云

寧河縣志

卷之八 人物

二四

廉 選字俊升拔貢生幼穎異及長嗜學書法得顏柳筆意其論舉業則奉歸胡諸大家爲的信筆成文不假思索年十六卽入泮後屢試冠軍食廩餼二十一膺選拔 學院錢拔閱試卷見其清新俊逸書法端楷亟爲歎賞名噪一時以戊午辛酉兩薦不售益銳志攻苦遂遭弱症猶手不釋卷年僅二十四而終至今士林猶惋惜之

劉潛字一飛別字東籬少穎悟不規規於章句之
學年十五受舉業於大興杜維澄甫成文卽知循習
先正十七入邑庠益攻苦胞叔守成丁巳進士也能
師事之乾隆壬申領鄉薦歲丙戌以揀選分發江南
初署揚州分府繼署高淳縣秉公守正常以濟人利
物爲懷彼都人士多樂頌之性閒逸淡於仕進不五
載遂解任歸家非素封二親垂老惟以舌耕供子職
經其指授皆成名於時如劉儀部人睿明經張時行
孝廉張中行馬倓馬儀卿皆其所造就者也生平敦
實行克以禮自持新纂邑乘每資其採訪事瀕就而
已逝里黨咸惋惜之

寧河縣志

卷之八

人物

五

吳志成字定齋生而穎異年十七補弟子員益志於
學通六經左史諸書博覽能文章所試皆優等遠近
來學者甚衆且精于神農之書及青烏家言後以歲
貢應補訓導未仕而卒子若孫皆克自成立以儒業
承其家

論曰聖門文學首推游夏尚矣史漢傳儒林文苑非
以種學績文之士不容氓沒歟寧河爲

京師近地得教化之先百餘年來涵濡

聖朝文治之隆鬱然稱畿東望邑生其間者類彬彬多
文學士焉固不敢遽擬聖門而於儒林文苑諸人庶
幾近之古所稱多文以爲富強學以待問者何多讓
焉